

рин же и воевода Михайло Александрович и шед вне оттуду, иде же сядяще правя градский закон, и повеле молчати всему народу. Молчанню ж бывшу, он же повеле чести сие написание. Людие ж || и всенародное множество, слышавше сицевая благодарения, возрадовашася радостно великою зело, и от радости со слезами прославиша бога, прославляющаго угодников своих блаженных Прокопия и Ивана и преподобнаго чудотворца Варлама. И воспомнуша<sup>п</sup> обет свой, и вскоре трудившася, постяся, и поставиша храм во градской осыпе, в нем же две службы учиниша, едину пречистыя богородица честнаго ея явления чудотворныя иконы, иже в Казани, другую же преподобнаго и богоноснаго отца нашего Варлама чудотворца. И образ преподобнаго на пяднишной иконе написаша и во храм поста||виша, и освяти апреля в 17 день на память преподобных отец наших Симеона, иже в Персиде, и Акакия, иже в лестнице, в первое лето, егда приимшу врученное ему от бога царския высоты хоругви правление благоверному и христоробивому царю и великому князю Михаилу Феодоровичю всеа Руси, его же бо всепремудрый хитрец на престоле царствия превеликия России устрои, пречестный крестоносный царский скипетр тому вручи и властодержца над всеми сотвори при митрополите же ростовскому и ярославскому и устюжскому Кириле. И устроиша у того ж храму повседневную службу, яко быти || двема священником, третьему ж диякону. О, глубина богатства, о, премудрости разума божия, о злия ти Христова, о, преславнаго чудеси, кто сему не подивится или кто не похвалит сицеваго чудотворца, преподобнаго отца нашего Варлама многочиснаго, яко в пятый день по освящении храма его апреля в 21 день во церкви пред образом его бысть чудо преславно: принесену бывшу младенцу, не видевшу очима много дни, ни веждьми не може подняти, яко и рукам и ногам вельми недугующим от болезни тоя; и обещавающимся родителем его написати образ преподобнаго Варлама и пети молебная, и абие прозре и всем телом бысть здрав. Маия в 10 день бого||лепнаго Христова преображения девичья монастыря старица именем Вера, едином оком вельми болезнующе 7 недель, прибегши ж во церковь ко образу преподобнаго Варлама ко утреннему пению и стояше пред образом, плачесь, не исхождаше; егда ж начаша литургию, она же очютився, яко бысть око ея здорово, не чюяше никакой ж болезни. Маия ж в 14 день пришед ко церкви жена именем Анна, поведа, яко скорченны быша у нея руки и ноги по три дни, она же обещася поститися преподобному две недели и в том часе бысть здрава от болезни тоя. Все ж людие видевше сия и славяху бога. Яви господь во граде Устюзе новаго чудотворца преподобнаго Варлама многочиснаго. Днесь бо, братие, Христос || скорбь нашу на радость претвари, излиа на нас великую свою милость, днесь бо нам преподобным отцем нашим Варламом чудотворцем от небснаго царя и бога милости испросит от пречистыя его матери, царицы и богородица, помощь и заступление собеседником своим блаженным Прокопием и с праведным Иванном. Мы ж, милость получивше, славим святую троицу, отца и сына и святого духа, ныне и присно, и во веки веком. Аминь.

(БАН, Арханг. К. № 51, лл. 97 об.—118).

<sup>п</sup> Испр; в ркп. воспоминаша.